

आपणो मेवाड़, आपणी बोली

जुलाई ऊँ सितम्बर-2020

जामणा



बणाबा वाळा:-

रामसिंह चारण, रतन लाल गाडरी अन गोवर्धन जाट

मदत करबा वाळा:-

मुकेश कुमार योगी, रतन लाल योगी अन कविता योगी



हे भगवान, जटे
माकाणी गलत वेवाँ
वटे माने बदलबा के
बाते त्यार करो, जटे
में सई हाँ, माको
वाँका हण्डे जीबो
होरो करो।



परदानमन्तरी करसाण सम्मान निदि ओजना (PM Kisan)

परदानमन्तरी करसाण सम्मान निदि ओजना का मइने देस का करोड़ो करसाणा ने साल का 6 हजार रिप्या मले हे। सरकार या रकम इलेक्ट्रॉनिक मूँ लेन -देन करन करसाण का खाता में नाके। अबाणू हालतरे केन्दर सरकार ईकी छटी किस्त का मइने 2,000 रिप्या करसाणा का खाता में नाक्या। अन थाँकाणी बी करसाण वेवो, पण अणी ओजना को मुनापो ने ले सकर्या हो तो परेसान वेबा की जरुत कोइने हे। यो थाने बतारियूँ हूँ के करसाण कस्यान पीएम किसान सम्मान निदी ओजना में आपणो नाम रजिस्टर कर सके।

परदानमन्तरी करसाण सम्मान निदी ओजना में अस्यान करा सकौँ हौँ ऑनलेण रजिस्ट्रेसन

रजिस्ट्रेसन करबाऊँ पेल्याँ कस्या कागज पान्दड़ा की जरुत पड़े।

- थाँका नके खेती की जगाँ की खाता नकल वेणी छावे।
- ईके अलावा आदार कारड,
- चालू खाता की बैंक पासबुक, गाम को पत्तो।
- खेत की जाणकारी अन एक फोटू छावे।

अस्यान करणो पेड़ी परदानमन्तरी करसाण सम्मान निदि ओजना में रजिस्ट्रेसन को पेतो काम

अबे पीएम करसाण की सरकारी वेबसाइट (<https://pmkisan.gov.in/>) पे जाणो। अटे नवा रजिस्ट्रेसन को विकल्प मेली, विंपे क्लीक करणो पेड़ी। पचे एक नवो पेज खुल जई। आगे नवा पेज में आपणा आदार नम्बर लिक्णा विंका केड़े रजिस्ट्रेसन फारम खुल जई।

तीजो काम - रजिस्ट्रेसन फारम में हारी जाणकारी देणी पेड़ी। जस्यान थाँकाणी कस्या राज्य का हो, कस्यो जिलो, तहसील कन गाँम की जाणकारी देणी पेड़ी। ईके अलावा करसाण ने आपणो नाम, मनक कन लुगई, जात, आदार कारड की जाणकारी, बैंक खाता नम्बर जणी पे रिप्या टाँसपर करे, विंका आईएफएससी कोड, पतो, मोबाइल नम्बर, जनम तिथि या जानकारी देणी पेड़ी। ईका अलावा आपाने आपणा खेत की जाणकारी देणी पेड़ी। जणिमें सर्वे कन खाता नम्बर, खसरा नम्बर, कतरी जगाँ हे या हारी जाणकारी देणी पेड़ी। या हारी जाणकारी भरबा केड़े सेव करणो पेड़ी। हारी जाणकारी देबा केड़े रजिस्ट्रेसन के बाते फारम ने सबमिट करणो। या हारी जाणकारी आबा वाळा टेम के बाते थाँकाणी अवेरन राक सको।

अटे फोन करन मदत ले सका हौँ

पण थाने कस्सी भी तरे की अबकई आवे तो परदानमन्तरी करसाण का कस्टमर केयर का नम्बर पे

फोन करन जाणकारी ले सको हो। परदानमन्तरी करसाण हेलपलाइन नम्बर – 011-24300606 हे।

2019 में चालू वी ओजना

परदानमन्तरी करसाण सम्मान निदि ओजना मोदी सरकार ने 24 फरवरी 2019 ने चालू किदी। अन या 01 दिसम्बर 2018 मे परभावित वेगी ही। अणी ओजना के मइने सरकार करसाणा ने हर साल 6,000 रिप्या तीन किस्ता में देवे। पेली किस्त एक दिसम्बर मूँ 31 मारच का बच में आवे। दुजी किस्त एक अपरेल मूँ 31 जुलाई अन तीजी किस्त एक अगस्त मूँ 30 नवंबर तक करसाणा का खाता में डारेट नाक देवे।

निर्माण संस्था बी अणिका फारम ओनलेण कररी हे :-

कपासण में निर्माण संस्था बी करसाणा के परदानमन्तरी करसाण सम्मान निदि ओजना का फारम ओनलेण कररी है। कपासण के भडे - पाळडे का गामाँ में ज्यो बी करसाण वेवे जे अणी ओजना मूँ बंचन रेग्या वेवे, ज्ये कणी कारणवस अणी ओजना में आपणो फारम ओनलेण ने करायो तको वेवे तो निर्माण संस्था फरी में परदानमन्तरी करसाण सम्मान निदि ओजना का फारम ओनलेण कररी हे। जणी के बी अणी ओजना में फारम भरणो वेवे वे अणी पतरिका के रेटे ओपीस को पतो दे मेल्यो हे। अणी पता पे आन आपणा फारम ओनलेण करा सके।

चुटकला

1. बासा : हेरपैली मारी नीन्द अजान मूँ खुले हे।

पाकिस्तानी : खुसनसीब हो भई जान, माकी तो बम धमाका मूँ खुले हे।

2. खून में थारे गरमी, गरमी में थारो खून.....उपरे हुरज रेटे धरती बच में - मई अन जून

3. लुगई :- अरे हुणो हो ? आपणो ब्याव कराबा वाळा माराज की मोत वेगी।

मनक :- एक न एक दन तो विंने विंका करमा को फळ मलणो हो।

4. देकन भार मेलबा वाळा दस किलोमीटर तक भागबा वाळा पाकिस्तान ने धमकार्यो वेतो के “अबे बी टेम हे हुदर जाओ”।

5. लुगई : थाँकाणी मारा लारे करवाचोत को एकानो केरो।

मनक : में थने कदि क्यो के मारी लार दारु पीबा चालणो।

6. बेटा : मारे ब्याव ने करणो! मने हारी लुगायाँ मूँ दरपणी लागे।

बापू : कर ले बेटा ! पछे एक लुगई मूँ दरपणी लागी, बाकी हारी बड्या लागी।

मेवाड़ी कविता

अकल

अकल धरती का सब जानवरों में वेवे।
कणिमें कम वेवे कणिमें हेली वेवे।
मनक जात अस्यी हे जणी में अकल हेली वेवे।
खाली अणी धरती पे मनक हे ज्यो अकल को काम लेवे।
दुजा जनावर कदी अकल मूँ काम नी लेवे।
अणी वाते जनावराँ ने वना अकल का केवे।
अस्या मनकाँ में बी कोई वना अकल का वेवे।
वणा मनकाँ ने दूजा मनक वना अकल का ढाण्डा केवे।
सब काम में अकल न्यारी – न्यारी वेवे।
कणी में कम तो कणी में हेली वेवे।
मनक जात आज का जमाना में अकल मूँ काम में लेवे।
अकल अणी धरती पे सब जनावराँ में वेवे।

पहेली

1. अस्सी कस्सी चीज हे ज्या रोज बढे तो हे पण कदि कम ने वेवे।
– उमर
2. वो कई हे जिंका नके एक आँक हे पण भी वो देक ने सके।
– हींवणी
3. अस्सी चीज हे जिंको आकार तो हे पण वजन कई ने हे।
– अकर

कहावत

1. कळी - कळी खुलगी।
अर्थ- ज्यादा खुश होना।
2. काळ्या को खादो कदी ने बंचे।
अर्थ- काले साँप का काटा हुआ व्यक्ति कभी नहीं बच सकता है।

जो
थाँकाणी
बड़्या
जाणो,
विंका
बाते
इमानदार
ने वेबो
जमारा ने
फेल
करबो
वेजा।

सम्पर्क

निर्माण सोसायटी
फ्लेट नं. 4, प्रथम मंजिल,
जानकी मोहन कॉम्पलेक्स,
उदयपुर रोड, पाँच बत्ती चौराहा के पास,
कपासन, चित्तौड़गढ़ राजस्थान-312202
फोन नं.-01476-230014

Email- rajasthanlanguages@nirmaan.org.in

Web- www.nirmaan.org.in